

T 5236.7/2213

13

11

1



皇明文徵卷之十五

晉江何喬遠穉孝選

哈佛大學哈佛燕京  
圖書館珍藏印

五言律一

宗藩

蜀獻王椿

賜教授方孝孺詩

伊昔開東閣相看眼獨青  
文章奏金石衿佩覩儀形  
應是游三輔焉能困一經  
前星垂炳耀染翰待彤庭

肅靖王真淤

紫騮馬

紫騮遊俠客玉轡珊瑚鞭行驅邁隴坂逐虜到  
燕然血汗風前疾霜蹄塞下穿寧辭沙磧險嘶  
斷玉門烟

趙康王厚煜

擬出塞

都護行邊日胡天雪正飛朝傳青海檄暮解白  
登圍龍虎行韜畧風雲入指揮何當請長組生

繫犬戎歸

武岡王顯槐

九月十三日鵠山殿下枉顧飲後偕余  
步月宮城口占

玉宇澄秋霽高城過晚嵐賞心當月九聽漏報  
籌三步輦陪仙從行宮侍鶴驂侍臣皆俊逸今  
復見淮南

晉府靖安王表秩

中秋

風色秋光淡雨餘山氣涼月明遙海度鴈陣遠  
天翔桂影清尊裏花陰曲檻傍高歌擬沉醉不  
解歎空囊

晉府靖安王新環

元夜懷易海洲中丞

淡月來深院寒烟接暮天華燈明綺席醪酒醉  
流年孤影梅花畔相思春艸邊遙知燕市裏  
和白雲篇

魯府穀城王常蓋

冬日陳達父對飲

寒色侵地滿簾鈎捲夜長鐘疎三徑月葉散一  
林霜茗漱詩脾健盧呼酒力强縱談銷絳蠟縹  
緲坐焚香

西池

夏夜寄懷謝山人時客汾陽

良夜孤清賞懷君倍黯然客星一以別明月幾  
迴圓紫塞雲邊樹青山雨後天相思何處寫隨  
意有冰絃

送李子和山人遊西蜀

諭蜀文誰著風流漢長卿欲投巴子國定向錦  
官城羸馬衝山色哀猿雜樹聲武侯遺廟在瞻  
謁重含情

安泐

送馮叅將赴陝西

仗鉞仍分陝乘時復請纓聲名歸大樹威武作  
長城電掣蒼龍劔風翻白虎旌塞塵當一掃萬  
里可橫行

睦樗

汴上逢李柬因寄李素甫

端坐意不適夏林颯已秋忽逢關外使暫緩望  
中憂野日迴殘照池烟澹夕流懷君欲何語獸  
上竹西樓

縉紳

汪廣洋

宿宣城山家

委曲疑無路幽深別有天偶披青嶂入得與白

雲眠樹密巢歸鳥溪迴響聞泉草堂終夜寂高  
枕聽鳴絃

陶安

湖鄉

淝水新無警湖鄉頗有年稻田驅夜豕蓮蕩捕  
秋鱖邏卒黃茅屋歸人白板船數家依綠樹斜  
日照炊烟

高啓

郊野

春泥桑下路孤策自扶行身賤知農事心閒見  
物情魚鳴風欲起牛飯月初生漸喜無人識何  
煩易姓名

方孝孺

懿文皇太子輓詩

相宅圖方獻還宮疾遽侵鼎龜懸寶命笙鶴動  
哀音誰紹三皇治徒傾四海心關中諸父老猶  
望翠華臨

韓守益

過九江

夷險休渝節勤勞莫問家暮船維柳樹春水泛  
桃花廬阜依霄漢江洲對渚沙多情白司馬文  
藻詠琵琶

徐尊生

梅雨

柴門喧嶂雨書案撲林霏遠陣久奔放空絲俄  
細微黃鸝暗却語白鷺止還飛晚色應無定浮  
雲悞作歸

鮑恂

次韻贈李煥章

採桂南山麓舉蘭北渚幽自憐修素節非是傲  
時流老鬢拚成鶴閑身乞作鷗幾思東海去却  
爲五鄉畱

王澤

寄泐季潭

珥樹香雲合龍河綠水新涼多今夏雨僧少去  
年人一騎畱京國孤鴻入塞塵西天幾萬里沙



草闊無垠

楊士奇

送性上人歸巴陵獨松菴

老禪心湛寂身被七條衣  
端坐無言說誰知精  
道機初來鸚渚見又問岳陽歸  
應憶松菴下諸  
僧候錫飛

王 偁

山寺尋僧

尋山憶慧能問偈過真僧  
竹覆山門雪花藏古  
寺燈千家供法食一衲挂疎藤  
不是遺經呪多  
應悟上乘

送沙子進赴祿州別駕

客舍酒初香都門柳色黃  
一官仍別駕萬里赴  
炎荒江路猿聲早山城榕葉涼  
遠人勞撫字且  
勿厭殊方

解 縉

御宴應制

紫苑神仙宅紅雲玉帝家  
殿鞭三下徹宮扇兩

行斜載筆趨青瑣開函進白麻錦袍三百輩天  
上酌流霞

胡儼

聞角

銀漏初傳箭長河已挂城忽聞嗚咽弄總是別  
離情獨客驚秋盡他鄉自月明燈花空有喜對  
酒不成傾

何喬新

武寧關書事

鳥道縈孤嶂潼函未足多馬肥秋出獵士飽夜  
聞歌殺氣浮朱戟寒光晃玉珂先聲聞漠北驕  
虜自投戈

張寧

重遊金粟

溪深容小艇山峻露層臺林葉經霜盡河水近  
午開閑雲僧出定暮雨客曾來邈邈浮生路經  
過知幾回

陳敬宗

永樂十五年觀燈應制

皓月金門夜和風玉殿春雲移三島近燈簇萬  
花新天仗臨丹宸星橋接紫宸中官宣德意實  
賞及詞臣

李 禎

周原幽居

山色峨眉秀江流燕尾分亂蟬吟落日獨鶴引  
歸雲黃葉溪邊樹青帘雨外村興來留客坐隨  
意倒芳尊

文 林

金華道中憶君謙

遠別輕千里經行歷萬山思君終夕坐出守幾  
詩還隄柳吹花盡溪雲過雨閒南峰著書處夢  
裡更躋攀

李 夢 陽

西天門候祀

瑤壇暮雪盡月出禁門西地靜鳴珂碎沙寒簇  
仗低臺官移斗柄衛士掃雲梯遙識龍文氣爭

傳法駕齊

朱遷鎮

水店回岡抱春湍滾白沙戰場猶傍柳遺廟只  
棲鴉萬古關河淚孤村日暮笳向來戎馬志辛  
苦爲中華

朱遷鎮廟

宋墓莽岑寂岳宮今在茲風霜留檜栢陰雨見  
旌旗百戰回戈地中原左衽時土人嚴伏臘偏  
護向南枝

劉家隔

匹馬淮山盡孤舟漸楚歌遠商吳蜀雜新雨漢  
江波驕燕斜斜下輕鷗片片過整帆遲明發天  
色定如何

酬京師友人見寄

浮雲悲故國積水起鳴雷不見長安日愁登古  
吹臺故人三月別天上一書來欲問經行處山  
中杜若開

顧子謫全州

楚城悲遠望君去更悠悠十月逢南鴈章江况  
北流寒沙帶宿莽霜日下孤舟明發湘東路應  
添吊屈愁

酬贈閣老劉公

雷奮龍猶卧雲俱鶴自閑一杯莘野月雙屐謝  
公山貴客常辭避田夫數往還桂庭秋偃蹇公  
醉拉誰攀

送甥嘉之茂州次玉溪侍御韵

蜀道元非易人言此更難虎風生萬壑蛇徑動

千盤北望常思闕西來 爲官無言羗性異汝

當郡民看

聞吳郡黃山人將遊五嶽寄贈

昨報三吳客將尋五嶽遊薜蘿應製服春水正  
宜舟二室雲中竣三花烟外浮住居吾幸邇先  
肯到商丘

戊寅元夕

春色潤冬後元宵驚蟄邊軟塵欺月散繁火奪  
星懸車馬中原地笙歌全盛年無勞驗花燼難

測是皇天

弘治辛酉年坐榆河驛倉糧乙丑年坐  
劾壽寧侯正德戊辰年坐劾劉瑾封事  
十年三下吏此度更沾衣梁獄書難上秦庭哭  
未歸圍牆花自發鎖館燕還飛况屬炎蒸積憂  
來不可揮

董玘

煮鶴

山人偶劈琴寂寞九臯音借問纏腰想何如食

肉心青田真易寫赤壁自難尋恐襲乘軒弊防  
微意亦深

彭城有懷

清夜棹歌發高秋客思生綿綿鄉國夢歷歷水  
雲程老樹危蟠石衝波怒齒城白門樓上月偏  
傍海東明

邊貢

送秦用中邑博得鹽字

殘溜滴崇簷離杯雨夜添儒官歸鄭老詩客去

高蟾調發囊琴古光涵匣劍銛昔賢身未達多  
少在魚鹽

送孫志同經畧居庸

馬出燕關道人如定遠侯眼空胡虜氣心繫廟  
堂憂絕塞蒼烟暮荒山白艸秋軍都城下過懷  
古一登樓

送翟給事廷獻策封周世子還朝兼赴

昌邑省觀

諫客劉棲楚詞人陸務觀舌存應不慮盟在可  
須寒賦頌名天下封章艸夜闌稿成須寄我歸  
向魯門看

送匡敬夫按貴州

歲晚神京別何時到鬼方雪迷山驛冷雲節海  
關長去住新驄馬封題舊皂囊遙懷征戰地幾  
處有耕桑

龍洞山襟咏

出郭始朝飯入山聞暝鍾自憐哀病久敢恨僕  
夫慵立馬看羣岫開尊對兩松誰能回白日延

眺且從容

朱應登

送別王公爵

深交元不厭  
近別轉堪憐  
去國逢春半  
懷人見月圓  
鄉心吳苑柳  
馬首秣陵烟  
願化江頭楫  
隨君去復旋

送姚惟寧出守

故人辭我去  
領郡向袁州  
歲晏離羣思  
山寒出郭愁  
行春時露冕  
乘月一登樓  
想見甘棠樹  
東風綠未休

田金州舟行至洵陽禱吟

窮源自嶓家  
流作漢江清  
食貨通湘徧  
方言禱楚聲  
林芳寒未改  
沙淨晚偏明  
便擬淮南卧  
前汀多杜蘅

閒坐

暫撥形骸累  
難消片日閒  
舉杯傾綠醕  
隱几見青山  
鳥語何多喜  
花枝亦令顏  
近村人意洽  
知是拜年還



康海

靈寶逢劉養和

君向甘泉去逢余滯虢州再來纔一日爲別已  
多秋回紇馴終易邊關計可憂屯田見餘論試  
以達宸旒

渡渭

吾亦愛滄洲春風信所遊不須歌桂棹渾勝坐  
蘭舟濁浪排風起輕帆及斫收稍東瞻太華遙  
在碧雲頭

陂頭

回首雙流細森疏萬木長遶溪蒲粉落夾路稻  
花香所向皆殊絕平看却渺茫幾時全郭叟伐  
竹構菴堂

王廷相

別劉尹良貴

與子良不淺襟期忽此違江湖一相送鷓鴣各  
分飛世難幾時靖宦情今已微那堪值搖落風  
露入秋衣

虎跳驛題壁

古驛層層上崇臺俯檜林山迴三峽秀雲過五  
溪陰石夜虎仍跳江春龍自吟憑高聊送目  
作旅愁深

何景明

登樓在艸店作

近訊中原使兼登萬里樓朝廷仍北極行在且  
南州峽斷風雲隔江通日月流如聞乘八駿早  
晚向崑丘

嚴嵩

奉命視牲

觀闕層城峻郊宮複道開市烟當樹合炬火逐  
塵來牲帖犧人報騶聲騎士催夜歸題笏記候  
曉奏蓬萊

郊行

沙路平如掌郊行吟望賒山圍四野碧河抱一  
村斜松徑入僧寺草屋見漁家春風幾日到滿  
園桃杏花

徐禎卿

在武昌作

洞庭葉未下瀟湘秋欲生高齋今夜雨獨卧武昌城重以桑梓念淒其江漢情不知天外鴈何事樂南征

孟洋

光州道中卽事

草根霜弄日沙路浪吹雲野色時時見鄉音處處分寒鱗深避餌凍羽不成羣無限村居樂樵

歌隔水聞

唐龍

寧塞營

楊柳圍軍壘茨梅蔭將壇地先來白鴈人慣射青豕埃火三更舉邊風八月寒丹心仗旄節鶴首據雕鞍

楊慎

侯朝簡王爵卿

文華接武英鳳吹應鷄鳴月晃牙牌字風傳玉

佩聲天香飄左掖宮漏隔西清不是斑行迥焉  
知夙夜情

沙河縣

空磧少人烟孤城大道邊平沙盤馬路殘雪射  
鵬天野日三竿上河水百片穿朝風將變柳客  
思感流年

薛蕙

道院看牡丹晚際遇雨作

把酒未成醉恍然驚暮寒薄陰含錦樹片雨濕  
朱闌霞妥青絲佩風搖赤玉盤微芳恐銷落珍  
重捲簾看

蔣山卿

寄顧英玉

客思逢搖落浮生信轉蓬詩成將暮雨書去及  
秋風氣槩嗟誰似斑行恨不同尊鱸真覺好空  
自憶江東

黃汝爲池上詠白蓮

幸以白玉姿依君白玉池素絲寧比潔珠樹詎

言奇照水還相媚隨風不自持誰云至性者皎  
皎易爲緇

送葉生入太學詩有典故

高皇開太學 慈后翼宏謨文物千年盛

規模百代無徵賢滿庠舍養士及妻孥君去休  
嗟晚鵬南尚可圖

林春澤

白洋口

萬壑奔青海雙峰夾白洋華夷明界限天地一  
封疆戍堞無烽燧山畬有稻梁承平思往事未  
可忽邊防

秋愁

濟北原佳麗秋深欲斷魂漁樵疲萬馬歌舞泣  
長門落日星辰動清都虎豹喧書生空涕淚何  
力正乾坤

林大輅

楚城人日懷大同

昔日雲中戍 先皇外四家連翩馳漢騎

談笑靜胡沙白日宮雲淡春風御柳斜只今胡  
湏洞倚劍一長嗟

李濂

中秋夜餞家兄

秋月圓如此吾兄復念家明隨鴻雁陣清傍紫  
荆花望斗悲漂泊開尊惜歲華誰憐歸去後孤  
影向天涯

夏言

聖壽醮筵

玉律調元氣金扉啓瑞氛九微朝絳節八會演  
玄文瓊圃三花樹瑤空五色雲霓旌將羽葆飛  
舞自繽紛

王廷陳

聞箏

花月可憐春房櫳映玉人思繁纖指亂愁劇翠  
蛾顰授色歌頻變留賓態轉新曲終仍自敘家  
世本西秦

馬汝驥

題龍泉寺

鶴觀層霄立龍泉萬仞飛嶽雲盤壁古天翠入  
牕微躡斗丹梯上朝元絳節歸松蘿冬更碧雪  
日映仙衣

許宗魯

登岳陽樓

澤水含秋盛樓光向晚孤倚闌聞白鴈把酒對  
蒼梧楚客悲今昔湘靈怨有無興來留賞地落  
日下平湖

許相卿

雲邨元日

雲邨又元日春意亦閒門國事支頤笏年光落  
手尊客携僧入社鄰賀鶴生孫邈矣孤山老神  
交百世論

王謳

送別郝孔微

歲暮長爲客今朝復送君離城千樹雪寒日萬  
山雲慘慘愁行路悠悠惜解分何時重會爾尊

酒莫辭醺

陳沂

觀音山江閣與顧英玉看月

鷺嶺宿龍宮凭欄一望中天遙滄海盡月小大江空亂石穿寒溜虛廊度晚風只疑銀漢渚偶爾使槎通

桂祥

癸和州

樓船開旭日涼露灑征衣擊楫橫江浦投詩采

石磯潮來紅蓼没人語白鷗飛天際瞻宮殿金陵在翠微

高叔嗣

省中春夕

纖月升庭樹柔風動四榮坐窺宿鳥至微悅觸幽情南國流鶯滿四郊春草生歸歟假羽翼長路起遐征

明月引

滿地金波迥中天玉鏡飛有烏多夜語無鴈不



春歸影徹銀河水光翻織女機何當御尊酒常  
此奉澄暉

途中遇樊少南便別行安肅縣作

驅馬一相見悠悠難再逢客心春夜月官舍白  
溝鍾不免微名累其如多病慵空臨南北路媿  
此平生蹤

歲暮答許武部廷議懷歸

掩閣日愁晚他鄉歲已深未能逃世網豈是戀  
朝簪以我不如意憐君同此心故園春事及歸  
路倘相尋

呂潭境

連山望不極况復楚雲長萬樹含春色孤村帶  
夕陽解鞍當古戍投袂及空堂去國日方遠懷  
君意敢忘

喜蕭司勳袁比部見宿山園

上客何時見中園屏卧幽門連莘野樹路轉信  
陵丘共坐深林晚紛看落木秋非君憐病侶誰  
向此淹留

顧夢圭

廉州除夕

海北臘未盡江南春已來  
高衙山鳥亂別院野  
桃開杳靄還家夢荒涼  
餞歲杯殊方柰孤燭斜  
日謾相催

王慎中

送呂思抑戶部之淮上

詔使發河陽仙郎惜署香  
家臨京口郡節建海  
陵倉冰後過全魯花時到  
下相蒼蒼葭菼外明

月定相望

送曾汝誠給事使邊

馬嘶柳帳前使者欲行邊  
插羽黃金弭擐纓白  
玉鞭飛雲迷漢月積雪凍胡天  
燕將聞書泣君  
看魯仲連

華察

過堠陽山居

林泉愜嘉遯乘輿訪幽踪  
野曠餘寒照山深多  
亂峰潭烟生暮色水木澹秋容  
不是桃源地虛

疑物外逢

樊鵬

寄袁雙溪

聞汝行塵在南陽定汝陽古城遙落日岐路滿  
秋霜鴈影江流隔猿聲楚塞長賈生官不貴莫  
怨漢文皇

陸粲

寄葛太守子中

憶爾投荒日依依戀翠華亦知行萬里不是爲

丹砂郡古留銅狄堂深繡土花勿須憂瘴癘意  
遠卽烟霞

蘇祐

諸將

羽檄飛秦塞兵符出漢宮嫖姚終服虜魏絳謾  
和戎寵錫非今日勲名已上天王猶按劍早  
獻朔方功

松子巖

松嶺度寒曛真穿虎豹羣太行窮地紀上黨拂

天文千里中原隘三河下界分雙旌颯飛鳥縹  
緲入層雲

河東道中

蒲坂水仍抱首陽山故連重華不可見孤竹轉  
堪憐暖色薰楊柳春聲換杜鵑河流日滾滾萬  
丈禹門前

登隋故城觀音閣柬徐芝南侍御

東幸無歸日離宮秋草生今登雲閣望返照海  
霞晴池曲纔通水臺高尚倚城斷橋明月夜何  
處聽歌聲

寄答王巖潭

巷接勞相訪途長思獨牽殞星余燕石切玉爾  
龍泉宦達重遷秩書回又隔年西征多贈略時  
拂遶朝鞭

王格

登縣東樓

山郭俯通阡凭欄野色連疎林殘碧葉古戍斷  
蒼烟雨霽歸雲外江流落鴈邊行人多醉卧禾

黍徧秋田

陳東

都下秋雨夜飲王子長宅

闊別時多屢蹉跎鬢已侵還朝明主賜卜夜故  
人心涼雨杯初覆空堂漏欲沉安知非夢寐相  
對帝城陰

沈愷

憶溪上

負郭茅齋小環溪竹徑斜鄰人具村釀穉子掃

庭花釣弋應堪老烟霞亦可家如何久爲客寥  
落負年華

吳子孝

初春過張子言

青鸞峙海嶠寂寞子雲居大隱非人外微言乃  
道初蘭薰朱閣小花氣玉琴虛白石饑堪飯逢  
君意不疎

送張山人徵伯歸樵李

失路誰相念思家自不禁吹簫江市伴爭煬旅

人心釣乏王孫飯遊窮季子金有才常不達歸  
入白雲深

秋日與子浚子約小集子循甫赴日南  
莫問銀河淺須憐玉笋空洛雲三歲隔楚月一  
宵同風櫪悲窮驥秋砧亂候蟲新涼有離思萬  
里憶征鴻

山閣

山閣梯崖窄晴巒對殿賒葉殮秋寺馬風噪晚  
城鴉和稔連枝熟蒹葭一水斜海隅烽火急何  
處復吹笳

皇甫汭

寄子約弟

兩地承嚴竄同時罷省郎因書問舟楫何日下  
沅湘客夢頻棲月征途欲戒霜平土題賦意那  
得倦遊梁

東溪寺

源自太  
盤山

東溪斜帶郭數里接仙源嵐氣迴盤嶺灘聲到  
石門僧開翠微舍客造白雲軒訝可無機事看

鷗代晤言

送道夫還大梁

歸心年不待高蹈古來聞  
牽世俱爲客辭官獨見君  
到家春草合度嶺瘴烟分  
去去嵩山迴何繇係白雲

挽張允清

奄忽成捐館平生不問家  
旌書卿士貢簣稱大夫  
華草聖留山寺萍踪斷海涯  
藏舟向何處那復是乘槎

孔天胤

緩歌

秋氣著桐竹果添林壑清  
碧光流枕簟朱火散欄楹  
端坐語言默緩歌心性平  
學仙無早悟歲晚或能成

范欽

夜發湘山

乘月下南亭方舟泝遠汀  
波涵灘水白燒入楚天青  
夜久風逾爽秋高露倍零  
不須論物役吾

意已沉冥

朱衡

春日咏西亭園

林丘匪云寂開戶俯河東  
百雉春雲裏千家曉霧中  
細唵黃雀渚高臥白雲叢  
向晚尋歸路漁舠一水通

高應冕

江村晚眺

荒村沉夕照烟樹幾人家  
野渡迎潮急寒山帶

月斜漁歸無遠市雁下有平沙  
寂寂秋江晚芙蓉自落花

皇明文徵卷十五

皇明文徵卷十五



皇明文徵卷十六

晉江何喬遠稭孝選

五言律二

縉紳

黎民表

楊祠部宅送陳玉叔之淮安

故人遙擁傳炫服且還鄉芳草經吳綠清淮入  
海黃離襟分夜月官燭照西堂祗益風塵夢隨  
君郢路長

得張廣平助甫書

經年傳尺素入手淚縱橫  
白髮生鄉國秋風到郡城  
著書千古事作吏衆人名  
謫去方年少懷沙莫愴情

聞吳明卿上計以禁例不得相晤賦此寄懷

流落閩中使生涯近始聞  
淚收江北雨身老越南軍  
積思生春草新愁隔暮雲  
倘携延水劍猶可報明君

張瀚

從軍曲

鐵騎遠從戎雲中望列烽  
胡笳偏警夜漢馬不能冬  
白草平堪藉黃沙疊作墉  
委身徇國難不爲覓侯封

水簾洞

青山不可極來往翠微中  
古洞時聞雨飛泉自作風  
石林孤磬香烟寺小堂空  
此路多靈異仙人何處逢

周天佐

哭楊太僕

識公今已死考德恨無繇  
一疏違雙闕孤標障  
百流風高三峽壯氣結五雲  
秋易得唐生淚川  
江欲盡頭

郭萬程

送濱州林二守

爾佐濱州守何如龔少卿  
單車一入郡赤子盡  
知耕近海濤喧座天高月抱城  
知君自長者不

復待王生

舒纓

秋懷

屋下亂蛭蟻風前聞擣衣  
懷人不可見獨坐掩  
柴扉庭午天還朗林秋葉已稀  
含情誰與訴閒  
送白雲飛

俞憲

龍山北門騁望

去海不百武春潮常到門  
霞光夜忽曙日氣午

先昏古場連山靜荒疇積水渾時因閱兵暇遊  
目上高原

沈鍊

寄馮敬叔

同作他鄉客嗟余更滯留關山明月夜邊塞白  
雲秋漢闕孤臣夢胡笳萬里愁桑乾河水近知  
是憶并州

萬虞愷

京師送萬丞之釜陽

拜官辭鳳闕驅馬出燕臺路入太行微雲連滄  
海隈濟時須一命况汝亦多才莫惜音書遠秋  
風有雁回

山中曉行

攬衣中夜起秣馬早鳴鞭殘月不照地明星猶  
在天出門頻問曉歷澗暗聞泉翳翳東林外山  
雲雜隴烟

喬世寧

梅花落

坐待梅花盡征人獨未歸曉妝臨鏡嬾春信到  
邊稀斷縷驚龍管餘香入鳳幃持將花比貌空  
有淚沾衣

吳維嶽

曙霞樓得泉字

一雨疑相妬衝泥怯錦鞵幽懷何所寄高閣上  
林前山牖澄新翠花香響暗泉醉中頻問夜斗  
轉欲朝天

黃伯善

元夕後漫書與玉溪

月暗藏燈夕春寒改火時江陰留宿雨玉曆動  
新曦已下麥秋有何嫌花事遲詩人休懶漫啼  
鳥到茆茨

王崇古

弔姜女祠

有序

姜女夫范郎楚澧州人昔秦發徒築  
長城郎婚三日以役行姜製寒衣引  
針刺院竹葉盡生絲嘗登江邊臺望

夫楚今遺刺竹種望夫臺址後赴塞  
覓郎道出晉曲沃適滄河漲不克濟  
姜怨哭以手拍河崖印入土中世遠  
土剝手跡仍存時秦法惰工者死瘞  
屍城中范郎罹焉姜至塞覓夫已死  
繞城大哭城傾骸見乃刺血試獲郎  
骨負以歸次宜君山麓渴甚一哭泉  
湧飲水復行三十里秦兵追之不及  
自度力竭不能歸遲回潦水山谷間  
乃囓石工斃石爲洞瘞郎骨尋坐而  
斃留金釵石隙中時復隱見吁亦奇  
矣土人卽洞立祠祀其夫婦今制有  
司歲時致祭如鄉賢儀嗚呼秦築長  
城七國遺黎懷貞抱藝駢首受戮者  
蓋億萬計姜一女子獨間關數千里  
百死不回卒能死夫難獲同瘞室秦  
兵莫害焉遺跡遍南北古今不磨豈  
天故庇之以顯烈婦耶抑示後世君

天下者戒耶稽之扶蘇蒙恬負忠孝  
節咸死塞上說者爲天道好還足報  
萬夫之冤信哉亡秦已矣爲人臣子  
而不知忠孝大義者視姜女何如耶  
事詳祠記可以觀矣歲乙卯兩河地  
大震哭泉祠就圯予按宜君過而傷  
之命有司葺飾并肖其夫祀如某山  
祠儀敬賦一首以慰幽貞

姜女來千里荒祠隔萬山哭泉疑楚淚刺竹擬  
湘斑遺骨悲難返貞魂苦未還漆川與江水流  
恨日潺潺

張遜業

送嚴子南歸

春草正芊芊啣杯駐馬前相知難作別爲客易  
經年驛路南逢越雲山北斷燕到家明月夜獨  
泛剡溪船

朱曰藩

寄程自邑

爾自三河返誇予二華遊衣裳靈岳霧行李汴  
渠舟客禮初筵減交情未見投殷勤花下句催  
夢過吳洲

皇甫濂

有所思行

悵憶山中暮佳期渺未歸靡蕪含露葉楊柳亂  
烟暉離瑟開塵匣條香卷夜衣愁心不及鳥猶  
逐白雲飛

殷士儋

送董別駕之壽春

春雪滯歸鴻離筵惜暫同名家滄海右薄宦楚  
雲東月映清淮水花明丹桂叢遙知參佐暇吟  
眺思無窮

王世貞

弔陸叔平墓

崩芳深山徑斯人長夜居誰憐一坏土却掩五  
車書玄素名空在丹青代不如齒牙吾自有從  
此倦吹噓



罄室先生爲月泉上人畫一錫一鉢聊  
成短贈

道人杖一錫一鉢復隨緣鉢中貯秋月錫底飛  
寒泉警鶴有時響收龍都靜眠但令無罣礙不  
愛辟支禪

送張仲立遊南雍

念爾芳蘭秀能令一坐清毫端寧下駟眼底誤  
兼城獄劍偶然鬱臺金元不輕試探平子篋應  
已賦南京

胡元瑞以新刻全集凡十種至衆體畢  
備日新富有輒敘其意并寄答五言律  
章

穆穆清風至泠泠白雪傳登壇牛耳定絕代鳳  
毛騫崛起三曹後橫行七子前預知千載下重  
數建安年

林天迪叅軍奉使吳越過訪弇中有贈  
甫下司農詔仍催少府緡同憐菜色者肯作繭  
絲臣宮樣年年巧官梭屋屋貧此時衣曳地誰

記慎夫人

方弘靜

東巖

巖端曙日暉巖下啓松扉流水不知處幽禽相  
與飛青山常對席白髮久忘機試與西鄰叟携  
壺上翠微

徐學謨

春夜舟泊龍江張肖甫中丞劉學孔光  
祿冒雨出餞余於江館作

故人車馬客方駕款江臯殘雪浮春漲微風生  
夜濤坐深沉玉漏語密靜檀槽明日看岐路蒼  
茫隔楚舸

徐中行

入桐江

奔流千折下峭壁兩崖分樵徑衝江雨漁舟宿  
嶺雲布帆林杪見水碓月中聞獨有披裘客千  
秋不可羣

張佳胤

宿黃牛峽

春到黃牛峽江辭白帝城楚雲高不極巴水去  
無聲絕塞書難得孤舟月正明棹歌聽自短幾  
處夜猿鳴

吳國倫

蕪春江上謁禹廟

山遶鴻沙曲城憑鳳嶺孤古祠銜絕磴飛浪灑  
平蕪萬里來江漢千門過舳艫可知神禹蹟浩  
蕩古來無

張四維

孝恪皇太后輓歌

桂宮悲往日柳絮引新哀十里城闈隔三臯隴  
道開綺羅百子殿風雨望陵臺又見容衣掩真  
遊竟不迴

張九一

同馬翰檢訪李比部先芳同作

霜雪朝能霽琴尊夜可消寒辭三殿盡春入九  
江遙北渚回鴻鴈南宮變柳條相將坐暝色海

月破烟霄

同陳李憲使泛漢江值江漲

波濤翻草屋歷歷上行舟地遠天橫下湍回水  
逆流不成張翰去且並李膺遊處處涼風發江  
門五月秋

周東田

郊行

雨餘行郭外柳岸起微風高壤已耕水壯丁初  
就農春雲平着樹暮鳥下依叢秦俗無人問溪

桃處處紅

張鳴鳳

自北關歸所居

休沐返官舍入門秋滿齋藤花叢吐壁桑葉厚  
鋪堦隱竹兒粘雀鈎簾婦怯蝸真成野人宅嘯  
詠適予懷

朱永年

田園雜書

朝市紛囂斷脩然太古初子皆稱父字妻亦解

卿夫不蓄能鳴雁惟栽散木樗雖非北山地俗  
朴可名愚

王世懋

上方廢寺

入寺迷芳徑尋碑識上方人天自興滅佛日爲  
蒼涼樹老猶依砌僧貧不具牀因垂本來意欲  
去復徬徨

廬山雪

朝日照積雪廬山如白雲始知靈境杳不與衆  
山羣樹色空中斷泉聲天半聞千崖冰玉裏何  
處着匡君

詹仰庇

宿西湖天竺寺道樑上人僧房

乳竇開青嶂雲居隱翠微石橋流水急竹徑到  
人稀雨積花頻落林深鳥不飛吾身無住着信  
宿始言歸

黃鳳翔

穆宗莊皇帝發引挽歌四首

垂衣方在御憑几那堪聞雨暗虞淵日星沉華  
渚雲周宮開翼室漢苑罷橫汾百辟趨蹌地傷  
心望紫芬

天挺聰明后人瞻眸穆容細旃頻勸講瑤殿早  
聞鐘恭巳儀刑肅勤民霈澤濃日來鸞輅寂空  
想鼎湖龍

端拱開昌運宸衷軫萬幾臯門懸鐸響祕殿弋  
綈衣禮爲明禋重兵因舞羽威鴻圖嗟未永盛  
際古今稀

泰寧今八葉寶籙擬千春峒藪烽烟淨邊關貢  
賚新一朝遺顧命萬國共傷神雨淚紛紛落朝  
昏望北辰

王祖嫡

韓藩暖泉

利物稱靈囿延賢陋雪宮虛無誇浪苑咫尺卽  
空同杯引流雲外舟行積翠中冷然銷暑氣况  
共大王風

顧大典

幽棲寺

爲入幽棲寺因窺靜者心半巖開佛地一逕引  
叢林背嶺江聲盡空廊月影深獨憐餘興在停  
策數峰陰

區大樞

春日宴天壇沈道士館

御柳葉初發仙桃花正飛物華天上至春色洞  
中歸鶴舞臨丹地鸞歌下紫微不知人世上能  
醉幾芳菲

早發遣興

江上潮初落林邊月尚存  
道風驅宿霧重露洗  
朝暎吹浪竈鼉沒  
摩天鶴鶴翻揚帆從所去  
魏闕復何言

謝杰

送在杭侄孫司理吳興

要秩還清秩危疑亦此官  
易憑直指氣多失長  
官權文網秋茶密人情蜀道難  
吾宗頻領郡議  
論每從寬

鄒迪光

秋懷

白日團青吳滄洲獨卧時露慳微潤草風濫屢  
芟枝去燕長留社來鴻不失期方秋多意緒宋  
玉獨何悲

張文熙

入荆門卽事

亂石紛于馬連岡勢若奔逕危低落日雲豁見  
孤村忽散千林紫迴光萬樹翻客情方興劇憑

軾入荆門

仲冬微雪示羽王

聞戶少人跡閒庭多暮鴉嶺梅未作葉隴雪已  
飛花帶雨沾輕幕乘風落淺沙懸知兔園客感  
此賦年華

遊彈丸溪同喻生

沿洄自成趣溪上有餘清白石若見底青山如  
有情野鷗時一起浦樹遠相迎何必滄浪裏臨  
流始濯纓



葉向高

渡江卽事

無嗟風土異已自邈關河村舍人烟少旗亭酒  
幔多春寒芳樹歇天闊斷鴻過長路方茲始微  
名柰若何

莊履朋

別林尉

桑梓勤吾念憑君破寂寥自今花下吏日折道  
傍腰象郡風烟隔龍城瘴氣消行春聊佐令亦  
足採歌謠

唐文獻

夢中賦詩以輕風爲題有拂花微墜露  
之句遂足成之

忽起青蘋末粼粼度曲阿拂花微墜露觸水不  
成波曉角疎傳響雲帆緩渡河縱然虛幌隔竹  
韻聽來多

袁宗道

送夾山母舅之任太原

身爲石室主閒與道人期判訟虎知法升堂猿  
報時泉聲寒井邑山翠染城池應有西遊草懷  
甥得幾詩

區大相

滄洲月下獨汎

乘汐臨芳渚停杯弄晚霞月華搖寶刹星影落  
江槎波送隨流葉風傳出霧花溯洄方未已閒  
興在蕪葭

卓明卿

題太常張公萬玉山房

稅田成野景引水入魚磯榻愛幽人下欄看宿  
鳥歸竹齊抽紫籜蓮盛長紅衣小憩銜杯得閒  
雲睥睨飛

送晉行吾別駕之任臨洮

二月安西路憐君擁節旄亂雲嘶去馬殘雪映  
征袍鞞鼓經時振烽煙度隴高秦中險阻地談  
笑憶功曹

顧起元

張孚之使君佚園

山色連門巷城陰覆苑墻地疎幽徑豁樹古弱  
枝蒼露草翻瑤砌風花影石房檀欒千萬箇晴  
雪灑衣裳

陳邦瞻

出朝陽門至神樂觀有述

藍輿還獨往郊路得盤桓溪水經城慢宮雲出  
野寒蒿萊棲御畝松檜隱天壇四顧鍾山色何  
如拄笏看

讀邸報作

天上雙朱邸相依日月邊桐圭元並剪花萼更  
聯翩正啓銀河路翻虞玉府錢桃天思化美宜  
詠二南篇

雷思霈

與武山人次初

先朝高士者太白與鵝池韋布有奇節縉紳無  
夙知西湖初月上南紀大風時憐爾巴山去須

裁二子詩

太白孫一元鵝池宋登春也

弁韜

鄧城

雙忠祠

守令在卑位殺身惟二公當時要路者不見一人雄戰苦乾坤赤城摧雀鼠空瞻依立毛髮萬木響悲風

山寇

烽火長不息將軍自厚顏人家如燒野客路盡荒山雨氣秋鳴壑猿聲夜到關卽無戡定策何以敢生還

李言恭

曉渡

煙樹曉棲鴉長汀帶白沙中流聊擊楫新水快浮槎雲與人爭渡春隨客到家遙知飛綵日開滿石城花

李元招

陳外翰張進士楊隱君李徵士過訪留飲次韻

高軒停薄暮小宴玩殘秋霧樹濃遮圃星河淡  
倚樓塵蹤看野馬物意會沙鷗去去滄江曲生  
涯理釣舟

陳第

至夷人帳房

胡人新納款野朴頗堪憐日落笳聲慘風吹酪  
氣羶支房氊作帳策馬木爲鞭文字猶蟲鳥惟  
憑譯者傳

韋布

方用晦

哭郭滄洲

破屋滄洲上清貧獨可憐書存無子讀詩好有  
僧傳葬卜中原夜墳鄰北溟邊窮交空白首莫  
贈買山錢

劉仔肩

別野晚晴與鄰叟久立

郊園初雨歇散步出荆扉落日在高樹涼風生  
客衣佛香僧舍近江影塞鴻飛亦有南鄰叟忘

言相與歸

黃淑清

中秋招陳生

明月起疎竹殘蟬生晚涼欲携可人客先掃白  
雲牀濁酒沽來賤初英近嗅香知君不惜醉倚  
杖候蘿墻

陳昂

泊雲安

裋褐絲絲斷爲冬不亦難蘆花裝被煖楓葉受  
霜乾溪日恩終厚山風勢未寒此間多美酒生  
計上雲安

白帝城七夕

高樓尊且倨雉堞遂來降峽釀襄王雨風翻夏  
后江黃花留暮景白帝坐秋窓躍馬今安在沙  
鷗舞自雙

張含

岳陽樓晚眺

涼風八月秋獨倚岳陽樓水自蠶叢國山含鸚

鷓洲過鴈防湖闊哀猿動客愁龍歸錦雲散鐵  
笛起漁舟

哭吾師空同先生

皇都傳六學媿我廁門牆賈誼空前席彭宣到  
後堂高才易陵替吾道極悲傷江漢風騷盡潺  
潺涕泗長

昔在長安日贈升菴

昔在長安日相逢各少年雲隨香案吏風送玉  
堂仙漢檻星辰動秦臺日月懸疎狂追故步春

興滿南天

離夕有贈效垂拱體

仙子武陵溪春深歸路迷翠翹迎露濕羅袖避  
風啼留珮花籠玉分釵月印犀金杯延落日酒  
醒各東西

秋夜

霜鴈孤鳴際秋宵獨坐情隙風微燭焰寒雨翳  
鐘聲六十無官職詩書有弟兄雕蟲真末技潦

倒負平生

微字  
妙

江一鵬

上方寺

去郭遠塵事入門聞慧香斷碑猶有字古刹已  
無廊啼鳥晝常寂野花秋正芳醉歸歌忼慨獨  
棹下殘陽

金鸞

泊淮上

愁輕遊冶興老重別離情野戍寒更盡河橋春  
水生斷雲疎鴈影殘月亂雞聲明發應千里蕭

蕭過楚城

魏學禮

宿泉上人山房

花落徑長靜鳥鳴春自閒雲行似相送日暮不  
知還支遁頗好古遠公時閉關松窓不能寐明  
月滿空山

陳鶴

卽事

訪舊孤村裏尋幽野徑邊綠隨千頃稻紅對一



池蓮遠浦橫秋艇高山入暮筵客居如向此日  
日有新篇

王穉登

石門道中懷家兄有年

不遠家山色頻歌行路難桑柔俱是女柳短未  
成官雨裡孤舟澁江南五月寒石門花萼近相  
過問平安

沈明臣

春日過宋諸陵

藁葬未須憐生時已播遷威儀非舊典世代是  
何年過客悲山鳥王孫種墓田回看隴頭樹似  
接汴京煙

哭胡司馬公

平生雙涕淚不易灑衣裳此地竟何土嗟余來  
斷腸高天行日月深谷隱冰霜一哭寒山裂淒  
風忽滿堂

王叔承

卽事

頗怪童謠數常憂已巳年鰲魚時震地太白晝  
經天莫問三邊餉其如九府錢百蠻休睥睨福  
德幽燕

徐應雷

賞菊

坐對南山蒼黃花開滿堂霜繁留正色風至散  
寒香服氣引空翠餐英帶夕陽醉餘仍採摘乘  
月釀秋霜

梅鼎祚

吳趨變曲

入室徵三婦開門接小姑單衫著杏子雙幔結  
茱萸夜色銷銀燭春心貯玉壺丈人且爲樂四  
座唱吳趨

符卿李公伯承丞余郡免歸濮陽

衆鳥敬亭散君歸先倦禽舊耽魯酒薄一臥岱  
雲深日憶江南曲風回濮上音雖非顛顛者澤  
畔自行吟

張鳳翼

登李白酒樓

不灑楊朱淚來登李白樓賦成遊八極名在自  
千秋水落青徐出天空海岱浮酒人雖異代猶  
可挹風流

梁璵

崧臺玩月

向夕高臺望清光睥睨齊地形雄古郡江勢接  
蠻溪正有關山曲虛傳烏夜啼如逢問租舫焉  
用姓名題

笏更朝元

章清源

咏杖頭童子

出入不離手行藏賴爾扶莫辭行路遠應念老  
人孤下水測深淺探朋窺在無待看仙詔下携  
汝上清都

錢月齡

銅井訪僧

曲曲桑麻路層層紫翠臺遠尋銅井去先訪竹

門開雲笥採茶入瓦罌沽酒回三生不盡話松  
日照蒼苔

釋衲

僧希復

訪環師

爲憶湯師好來過祇樹林誰知乘筏會却得衣  
珠心四衆巡堂語三時演法音何年親領受一  
侍白雲深

僧梵琦

漠北懷古二首

北向無城郭遙遙接大荒舊來聞漢土前去是  
河隍野蒜根含水沙葱葉負霜何人鳴感築使  
我涕沾裳

每厭冰霜苦長尋水草居控弦隨地獵剗木近  
河漁馬酒茶相似駝裘錦不如胡兒雙眼碧慣  
讀左行書

姚廣孝

晚過獅子林蘭若

無地堪逃俗乘昏復到林半山雲過磬深竹雨  
留禽觀水通禪意聞香去染心叩門驚有客想  
亦爲幽尋

釋魯山

送僧住惠山寺次邵民部國賢韻

路僻塵囂遠尋幽客自來水清魚見底碑久字  
生苔猿鳥啼深樹烟霞護古臺野花渾似我只  
向靜中開

釋懷讓

經廢花徑寺

畫壁暗塵凝蘿龕冷佛燈壞垣欹老樹古榻擁  
殘僧齋斷禽長散樓傾客畏登生涯同幻泡興  
廢總難憑

閨秀

朱靜菴

客中偶成

異鄉久爲客風雨阻歸程兩岸數峰碧孤舟一  
羽輕篷牕殘燭在烟樹早鴉鳴坐待東方曙依

稀見海城

孫夫人楊氏

城南別女

迢迢向南國五月發長安  
惟念鳴環女初令事  
伯鸞心折言難盡車停日  
又闌行行復回首淚  
下不能彈

都御史李昂妻陳氏

春草

無人種春草隨意發芳叢  
綠遍郊原外青回遠

近中决烟粘落絮和雨襯  
殘紅不解王孫女  
妻對晚風

六言律

縉紳

高啓

瓊姬墓

夢 峒殿頭斷釵零落誰收  
土昏青鏡忘曉

月冷珠襦恨秋麋鹿昔來  
廢院牛羊今上荒丘  
香魂若怨忘國莫與西施  
共遊

康海

普緣觀眺次仲默

地僻柳條初綻春深小桃未花草房凹口雲散  
蕎麥山頭日斜傍壑數椽僧舍隔谿三老人家  
龍窟千尋俱水蒼煙四望無涯

南大吉

倒馬關晚興

山館依微返照石城爛熳明霞虛亭但對關月  
永夜空聞戍笳胡馬幾年款塞漢軍何日還家

青樓少婦幽獨白露橫砧怨嗟

范欽

海橋草堂

地控金陵翳鳳門臨銀海垂虹煙花四時掩藹  
霧樹萬里冥濛罷釣人歸夜月行歌烏領春風  
相如去時題柱買臣還日乘驄

潘緯

題仙源

君家樓隱何在合杳雲山萬重望中雞犬不見

行處漁樵相逢洗耳窓前流水爲鄰戶外諸峰  
知是武陵仙境迷人自愛追蹤





